



Vaziyat

2023 йил
1 июнь
№ 22 (911)



Ўзбекистон Республикаси Фавқулодда вазиятлар вазирлиги нашри ○

Газета 2004 йил 7 майдан чиқа бошлаган



“Ёш қутқарувчи – 2023”

ҒОЛИБЛАР АНИҚЛАНДИ

Жиззах шаҳрида “Ёш қутқарувчи” кўнгилчилар клублари ўртасидаги мусобақаларнинг Республика босқичи ўтказилди.

Унда умумтаълим ҳамда касб-хунар мактабларининг “Ёш қутқарувчи” кўнгилчилар клубларидан жами 28 та жамоа баҳс олиб борди.


Қизғин ва мурасимсиз кечган мусобақа натижаларига кўра, касб-хунар таълими муассасалари бўйича 3-ўрин Тошкент шаҳар Юридик техникуми жамоасига насиб этган бўлса, 2-ўринга Ўзбекистон Республикаси ИИБ Сурхондарё Академик лицейи жамоаси муносиб деб топилди. Барча шартларда юқори натижаларни қайд этган Ўзбекистон Республикаси

ИИБ Жиззах Академик лицейи жамоаси 1-ўринни қўлга киритди.

Умумтаълим мактаблари жамоалари ўртасида ўтказилган баҳслар бўйича Тошкент шаҳар Учтепа туманидаги 116-сон умумтаълим мактаби жамоаси 3-ўринни, Фарғона вилояти Қувасой шаҳрининг 1-сон умумтаълим мактаби жамоаси 2-ўринни, Жиззах вилояти Пахтакор тумани 2-сон умумтаълим мактаби жамоаси 1-ўринни қўлга киритди.

Ғолиб ва совриндор жамоалар диплом, фахрий ёрлиқ ҳамда қимматбаҳо совғалар билан тақдирландилар.

Ҳ.КАРИМОВ, Б.ҚОБИЛОВ,
Жиззах вилояти ФВБ ходимлари.



ЁШЛАР МУАММОЛАРИ ЎРГАНИЛМОҚДА

Бекободлик ёшлар иштирокида “Маҳалладан вазирликкача” тамойили асосида учрашув ташкил қилинди. Унда Ўзбекистон Республикаси Фавқулодда вазиятлар вазири ўринбосари полковник М.Муҳитдинов иштирок этди. Вазир ўринбосари мазкур тадбирда бириктирилган ёшлар билан бевосита мулоқот ташкил қилиб, уларнинг муаммолари ва орзу-мақсадлари билан ўртоқлашди.

Самимий руҳда кечган учрашув давомида шаҳар ҳокими ҳамда мутасадди корхона ва идоралар раҳбарлари билан ҳамкорликда манзилли иш ташкил этиш, ёшларнинг бандлигини таъминлаш, ҳаётда ўз

ўрнини топиши ва ижтимоий-иқтисодий муаммоларини ҳал этишида кўмаклашиш ва яна бошқа вазифалар юзасидан тегишли чора-тадбирлар белгилаб олинди.

ФВВ Матбуот хизмати.



ФВБ ХОДИМИ – ОСИЁ ЧЕМПИОНАТИ СОВРИНДОРИ

Тошкент шаҳрида Ашихара-карате спорт тури бўйича Осиё очик чемпионати ўтказилди.

Мусобақада 700 нафардан ортиқ иштирокчи ғолиблик учун жанг олиб борди. Мурасимсиз кечган жангда ФВВ ходими – Қашқадарё вилояти ФВБ махсус вазифаларни бажарувчи минтақавий қутқарув отряди қутқарувчиси Рўзимурод Умбаров 70 кг. вазнда 2-ўринни эгаллади ҳамда жаҳон чемпионатига йўлланмани қўлга киритди.

Рўзимурод Умбаровни ушбу муваффақият билан муборакбод этиб, келгусидаги мусобақаларда омад ва зафарлар тилаб қоламиз.

Қашқадарё вилояти ФВВ матбуот хизмати.

ТАҚДИРЛАШ

Миллий гвардия Тошкент шаҳар Қўриқлаш бошқармасида умумтаълим мактаблари ўқувчилари ўртасида “Ёш гвардиячи” ҳарбий-спорт мусобақаси республика босқичи ғолибларини тақдирлаш маросими бўлиб ўтди.



Тадбирда Миллий гвардия қўмондонлиги, Республика Ҳарбий прокуратураси, Мактабгача ва мактаб таълими вазирлиги, Ёшлар ишлари агентлиги раҳбарияти қатнашдилар.

Тантананада Бош прокурор ўринбосари – Ўзбекистон Республикаси Ҳарбий прокурори Ботир Кудратходжаев иштирок этиб, ғолибларни тақдирлади.

Биринчи ўринни Қорақалпоғистон Республикаси Тўрткўл тумани 18-умумтаълим мактаби аъзолари эгаллаган бўлса, иккинчи ўрин Навоий шаҳар 1-умумтаълим мактаби вакиллари, учинчи ўрин эса Наманган вилояти Чортоқ тумани 5-умумтаълим мактаби жамоасига насиб этди.

Ғолиб жамоалар диплом, қимматбаҳо совғалар, скутер ва велосипед билан тақдирландилар.

Сардорбек ЁРМАТОВ,
Ўзбекистон Республикаси
Ҳарбий прокурори ёрдамчиси,
адлия подполковниги.

Самарқанд шаҳрида Қўриқлаш бошқармаси тизимидаги барча вилоят бошқармалари, туман (шаҳар) бўлимлари масъуллари иштирокида “Бўлимларда хизмат интизомини мустаҳкамлаш амалиёти, ҳуқуқбузарликлар профилактикаси ва жиноятчиликнинг олдини олишнинг долзарб масалалари” мавзусида илмий-амалий конференция бўлиб ўтди.

АНЖУМАН

Бир қатор вазирлик, қўмита, муассаса ва ташкилотларнинг масъул ходимлари қатнашган ушбу тадбирда тизимдаги ходимлар орасида интизом бузилишига олиб келувчи омилларнинг сабабларини олдиндан аниқлаш, ходимлар маънавиятини янада юксалтириш, бўлимлар жанговар шайлигини юксак даражада ушлаб туриш орқали хизмат интизомини мустаҳкамлаш, ходимларни рағбатлантириш, ҳуқуқбузарлик ва



жиноятларни барвақт аниқлаш, уларнинг олдини олиш масалалари муҳокама қилинди.

Шунингдек, Самарқанд ҳарбий прокурори О.Ўсаров “Ходимлар ўртасида жиноятларни барвақт аниқлаш, уларнинг олдини олишда ҳарбий прокуратуранинг ўрни” мавзусида маъруза қилиб, бу борадаги мавжуд муаммолар ва уларнинг ечимлари тўғрисида тегишли таклифларни билдирди.

Шавкатжон ШАРОФЖОНОВ,
Самарқанд ҳарбий прокурори ёрдамчиси,
адлия катта лейтенанти.

БЕЛЛАШУВ

Бухоро ҳарбий прокурори М.Бозармирзаев, ФВВ Тарбиявий ва мафкуравий ишлар бўлими бошлиғи Ж.Ҳасанов, вилоят ФВБ масъуллари иштирокида “Аждодлар изидан” интеллектуал ўйинлари биринчилиги ўтказилди.

Тадбир давомида ҳудудий бошқармалардан 11 та жамоа ўзаро баҳс олиб борди.

Ғолиб жамоа “Аждодлар изидан” интеллектуал ўйини республика босқичига йўллангани қўлга киритиш билан бирга, фахрий ёрлик



ва эсдалик совғалари билан тақдирланди.

Дилшодбек АБДУЛЛАЕВ,
Бухоро ҳарбий прокурори ёрдамчиси,
адлия катта лейтенанти.

САНАГА БАҒИШЛАНДИ

Гулистон ҳарбий прокуратураси томонидан Миллий гвардия Сирдарё вилояти бошқармаси, Қўриқлаш бошқармаси, вилоят Спорт бошқармаси, Ёшлар иттифоқи билан ҳамкорликда Бахт шаҳридаги Республи-

ка ўғил болалар ўқув тарбия муассасасида ўқувчилари иштирокида 1 июнь – Халқаро болаларни ҳимоя қилиш кунига бағишланган маънавий-маърифий тадбир ташкил этилди.

Тадбир доираси-



да ўқувчи-ёшлар ўртасида камондан ўқотиш, шахмат-шашка, мини футбол бўйича мусобақалар ҳамда “Ёш математик”, “Қувноқ стартлар” каби танловлар ўтказилди. Шунингдек, Миллий гвардия мутахассислари томонидан жамоат хавфсизлигини таъминлаш билан боғлиқ кўргазмалар намоиш этилди.

Шоҳрух МУХАММЕДЖАНОВ,
Гулистон ҳарбий прокуратураси
терговчиси, адлия
подполковниги.

Чирчиқ шаҳрида жойлашган ҳарбий қисмларнинг бирида Ўзбекистон Республикаси Ҳарбий прокурори Ботир Кудратходжаев иштирокида “Прокурор ва ёшлар” учрашуви ўтказилди.



ПРОКУРОР ВА ЁШЛАР

Унда Ўзбекистон Республикаси Ҳарбий прокурорига бириктирилган ёшлар ўз саволлари, муаммолари билан мурожаат қилиб, тегишли ҳуқуқий тушунтиришлар, тавсияларга эга бўлдилар.

Шунингдек, ёшларга мамлакатимиз ривож, истиқболи учун муносиб ҳисса қўшиш Ватан олди-

даги муқаддас бурч эканлиги фаол ёшлар мисолида атрофлича тушунтирилди.

Эргаш ТИЛАВОВ,
Ўзбекистон Республикаси
Ҳарбий прокуратураси бўлим
ҳарбий прокурори,
адлия полковниги.

Жиноят ва жазо

ЛИЦЕНЗИЯСИЗ ФАОЛИЯТ

Ҳар бир ишда қонун-қоидага амал қилиш керак. Шундагина ортиқча гап-сўз бўлмайди. Бироқ С.С. бунга амал қилмади. У норасмий ишлаётган МЧЖга қарашли дорихонада ўтказилган назорат остига олиш тезкор-қидирув тадбирида С.С. 14 дона “Регален 300” дори воситасини 280 минг сўмга ҳамда “Тропикомид 10 мл” томизғисини 200 минг сўмга, жами 480.000 сўмга сотган вақтида “қопқон”га тушган. Маълум бўлишича, С.С. тегишли махсус лицензия ва рецептсиз, қонунга хилоф равишда 28 дона “Регален 300” ва 4 дона “Тропикомид 10 мл” ни 1.000.000 сўмга сотган вақтида ашёвий далиллар билан ушланган.

Ўзбекистон Республикаси ИИВ ЭКМ бош марказининг хулосасига кўра, С.С.дан олинган дори воситаси ва томизғи кучли таъсир қилувчи моддаларга кирувчи эканлиги маълум бўлди.

– Дорихонада фармацевт бўлиб ишлайман, – деди судланувчи С.С. – Вазифам дорихонага дориларни олиб келиш, қабул қилиб олиш, нархларни кўйиш ва келган мижозларга сотишдан иборат. Чилонзор туманидаги “Қатортол” кўчасида нота-ниш шахсдан ўзим истеъмол қилиш учун “Регален 300” дори воситасини ҳамда 4 дона “Тропикомид 10 мл” ни сотиб олганман. Бир кун бир харидор келиб, ана шу дори воситаларини сўради. Мен унга сўраётган дорилар борлигини айтдим. Қисқаси, харидорга қонунга хилоф равишда 1.000.000 сўмга сотганман. Айбимни тан оламан. Бошқа бундай ишга қўл урмайман. Кечиринглар.

Суд давлат айбловчисининг хулосаси ва ҳимоячиларнинг маърузаларини тинглаб, жиноят иши ҳужжатларини ўрганиб чиқди. Суд судланувчига С.С.га жазо тури ва миқдорини тайинлашда жиноятни ғараз ниятларда, кўпчилик учун хавфли усулда содир этганлигини жазони оғирлаштирувчи ҳолат сифатида эътироф этди. Шунингдек, унинг шахсини, илгари судланмаганлигини, қилмишидан пушаймонлигини, оилавий шароитини, қарамоғида вояга етмаган уч нафар фарзанди борлигини жазони енгиллаштирувчи ҳолат, деб баҳолади.

Суд С.С.ни жамиятдан ажратмаган ҳолда қайта тарбиялаш мумкин эмас, деган қатъий фикрга келиб, унга айблов моддаси санкциясида назарда тутилган озодликдан маҳрум қилиш жазосини тайинлашни мақсадга мувофиқ, деб топди. Шундай қилиб, фармацевт ЖКнинг тегишли моддасида назарда тутилган жиноятни содир этганликда айбдор, деб топилди. У 7 йил муддатга озодликдан маҳрум этилди.

Хусанбой ПАРПИЕВ, жиноят ишлари бўйича
Яккасарой туман судининг судьяси.

УЧ АВЛОД УЧРАШУВИ

Сергели тумани Маданият марказида мактабгача ва мактаб таълими бўлими ҳамда туман ҳарбий гарнизони ҳамкорлигида "Уч авлод учрашуви" тадбири ўтказилди.



Тадбирда 7-сонли умумтаълим мактаби, 605-, 552-сонли мактабгача таълим ташкилотларининг "Биз – ёш Ватанпарварлармиз!" тўғараги аъзолари ўз чиқишлари билан иштирокчиларни мамнун этдилар.

Учрашувда катта авлод вакиллари ўз ҳаёт ва хизмат йўллари ҳақида ёшларга ҳикоя қилиб, зарур маслаҳат ва тавсиялар бердилар.

Фахриддин РАҲИМОВ.

ТАВСИЯНОМАЛАР ТОПШИРИЛДИ

Наманган вилояти ФВБда хизмат қилаётган ҳарбий хизматчиларнинг фарзандларига олий ўқув юртлари ҳамда олий ҳарбий таълим муассасаларига имтиёзли ўқишга кириш ҳуқуқини берадиган тавсияномалар топширилди.



Бошқарма бошлиғи генерал-майор Қосимали Аҳмедов тадбирни очиб, тавсияномага эга бўлганларни табриклади.

Улуғбек БОБОЖОНОВ,
Наманган вилояти ФВБ бошлиғи
ўринбосари, подполковник.



Namangan shahridagi "Oydin Plaza Hotel" mehmonxonasida BMTning O'zbekistondagi Taraqqiyot dasturi, FVV va Raspublika Gidrometeorologiya xizmati markazi bilan hamkorlikda "O'zbekistondagi jamoalarning iqlim o'zgarishi oqibatida yuzaga keladigan tabiiy xavflarga chidamliligini oshirish uchun erta ogohlantirishning kompleks tizimini ta'komillashtirish" qo'shma loyihasi asosida "Birinchi tibbiy yordam ko'rsatish" mavzusida seminar-trening o'tkazildi.

TRENING

Unda Pop tumanidagi "Bog'ishamol" va "Imomota", Kosonsoy tumani "Obodon" MFY-lari hamda tuman FVDT xizmatlari vakillari ishtirok etdilar.

Sanjar RAHIMOV,
Namangan viloyati FVB xodimi.

Mirg'olim KARIMOV,
Namangan shahar FV bo'limi xodimi.

БАРТАРАФ ЭТИЛДИ

Автомобиль йўлининг 252,2 км. "Тошкент-Водий" йўналишида ҳаракатланган, 2 нафар йўловчиси бўлган "Cobalt" русумли автомашина ҳайдовчиси бошқарувни йўқотиши оқибатида автотранспорт воситаси кўюветга тушиб кетган. Натижада ҳайдовчи ва йўловчи тан жароҳати олган.

Воқеа жойига 12-механизациялашган назорат-кузатув гуруҳи оддий аскар М.Имомназаров, ёнги-қутқарув отрядидан 1 та жанговар "ISUZU" русумли ёнги ўчириш техникасида ЙПХ ходимлари ва ТТЁ "Қамчиқавтойўл" ИЙФУКнинг куч-воситалари жалб қилиниб, автомашина хавфсиз ҳудудга олиб чиқилди.

И.БҮТАБОЕВ,
"Қамчиқ" МҚЁҚБ АҚО командири,
капитан.

ИЛЛАТГА ҚАРШИ

Навоий кон-металлургия комбинати Ёнги хавфсизлигини таъминлашни ташкил этиш марказида "Коррупциясиз фаолият — ривожланиш гарови" мавзусида давра суҳбати бўлиб ўтди.

Унда шахсий таркиб ўртасида коррупция, қимор ўйинларини ўйнаш, ёлғон маълумотлар тарқатиш, ходимлар томонидан йўл ҳаракати хавфсизлиги қондаларининг қўпол равишда бузилиши, спиртли ичимликлар истеъмол қилган ҳолда автомобилни бошқармаслик, фуқаролар билан мулоқотга киришганда хушмуомалада бўлиш, тамағирлик ва фирибгарлик каби иллатларга йўл қўймаслик юзасидан тушунтириш ишлари олиб берилди.

Шу билан бирга Ўзбекистон Республикаси Вазирлар Маҳкамасининг 2005 йил 25 июлдаги "Ўзбекистон Республикаси Қуролли Кучларининг ҳарбий хизматчиларига турар

жойни ижарага олганлик (ижарада турганлик) учун ҳар ойлик пул компенсацияси тўлаш тартиби тўғрисида"ги қарори ва бу йўналишда вазирликнинг тегишли буйруғи талаблари асосида марказ ҳарбий хизматчиларига компенсация пуллари тўлаш тўғрисида ҳам масъул ходимларга зарур кўрсатма ва тавсиялар берилди.

Ёрқин АБДУЛЛАЕВ,
Навоий вилояти ФВБ
шахсий хавфсизлик бўлими
бош
инспектори,
капитан.
Маъруфжон
ҲАЙИТОВ,
НКМК ЁХТТЭМ гуруҳ
бошлиғи, катта
сержант.



DAVRA SUHBATI

FVV Maxsus muhandislik-qurilish boshqarmasi shaxsiy tarkibi va Toshkent shahar Mirzo Ulug'bek tumani "To'qaytepa" masjidi imomi S.Mamadaliyev ishtirokida "Yot g'oyalarga qarshi immunitetni shakllantirishda axborot iste'moli madaniyatining o'rni" mavzusida davra suhbati tashkil etildi.



Tadbir yakunida harbiy xizmatchilarni qiziqtirgan savollarga atroflicha javob berildi.

I.KAJANOV,
tarbiyaviy va mafkuraviy ishlar bo'limi
OAV bilan ishlash bo'yicha katta texnik,
oddiy askar.

E'TIBOR

Farg'ona viloyati FVBda tizimda uzoq yillardan buyon fidokorona mehnati bilan o'z xizmat vazifasini sidqidildan bajarib kelayotgan, mamlakatimizning tinchligi, osoyishtaligi, rivojlanishi va qonun ustuvorligini ta'minlashda jonbozlik ko'rsatib kelayotgan 20 nafar harbiy xizmatchilarning farzandlariga respublika oliy ta'lim muassasalariga o'qishga kirish uchun tavsiyanomalar topshirildi.

Davlatjon SHERMATOV,
Farg'ona viloyati FVB bo'lim boshlig'i, podpolkovnik.



Qashqadaryo viloyati FVBda 50 dan ziyod harbiy xizmatchining 54 nafar farzandiga oliy o'quv yurtlari hamda oliy harbiy ta'lim muassasalariga imtiyozli o'qishga kirish huquqini beradigan tavsiyanomalar topshirildi.

RAG'BAT



Tadbirda boshqarma rahbariyati, ota-onalar, yigit-qizlar va harbiy xizmatchilar ishtirok etdi. Tadbir so'nggida bo'lajak talabalarga Vatanimizga sodiq insonlar bo'lib kamol topishiga ishonch bildirildi.

Shaxboz
BOBOMURODOV,
Qashqadaryo viloyati
FVB matbuot xizmati
xodimi, oddiy askar.
Fazliddin KAMOLOV,
kadrlar bilan ishlash
bo'limi boshlig'i,
podpolkovnik.

МАРКАЗДА ЎҚУВ

ФВВ Академияси ҳузуридаги Бошланғич тайёргарлик ва малака ошириш марказида вазирлик тизимидаги ёнғин-қутқарув автомобили қутқарувчи-ҳайдовчилари таркиби билан Самарқанд вилоятидаги “UzAuto Trailer” корхонасида Россия давлатининг “Варгашинский Завод ППСО” қўшма корхонаси бош муҳандис ўринбосари Евгений Яковлев ҳамда Марс Абзалиловлар иштирокида “КамАЗ 65115-1041-62х4” русумли замонавий ёнғин-қутқарув автомобилларининг тактик-техник хусусияти ҳамда ишлатиш принциплари юзасидан семинар машғулоти бўлиб ўтди.

Унда ФВВ Академияси ҳузуридаги Бошланғич тайёргарлик ва малака ошириш маркази бошлиғи полковник С.Аҳмедов,

шунингдек, марказ ўқитувчи ва тингловчилари иштирок этди.

Сўзга чиққанлар томонидан соҳамизнинг ёш ҳарбий хизматчи ва хизматчиларига юртимизда ишлаб чиқарилаётган замонавий “КамАЗ” русумли ёнғин-қутқарув автомобиллари бўйича маълумотлар берилиб, ёнғин, авария ва фавқулодда ҳолатларни бартараф этишда, шунингдек, инсонларни қутқариш ишларида фойдаланиладиган ёнғин-қутқарув автомобилларидаги мавжуд авария-қутқарув асбоб-анжомлари бўйича кенг камровли тушунчалар берилди.

Ш.БАҚОЕВ,
ФВВ Академияси
ҳузуридаги БТ ва МОМ цикл
бошлиғи, подполковник.
Ж.ХОЛМУРОДОВ,
цикл ўқитувчиси,
майор.

КЎРИКДАН ЎТКАЗИЛДИ

“Қамчиқ” махсус қидирув, ёнғин-қутқарув бошқармаси тасарруфидаги автотранспорт воситалари ҳамда ёнғин-ўчириш машиналарини баҳор-ёз мавсумига ўтказиш олдидан Тошкент вилояти Йўл ҳаракати хавфсизлиги бошқармаси томонидан малакали ходим жалб қилиниб, техник кўрик ишлари олиб борилди.

Тадбир давомида бошқарманинг бир гуруҳ ҳайдовчилари иштирокида ўзига бириктирилган техникани бошқаришдан олдин унинг техник соҳасига, ёритиш чироқларининг тўлиқ

ёниши, тормоз тизимининг соҳасига, совитиш суюқлиги, мотор мойининг меъёрига алоҳида эътибор қаратилиши ва яна қатор вазифалар юзасидан тушунтириш ишлари олиб борилди.

Б.ҚУРБОНОВ,
“Қамчиқ” МКҚБ
МТТ ва ТФНҚБ
бошлиғи, майор.

YONG‘IN NAZORATI

O‘zbekiston Respublikasi “Yong‘in xavfsizligi to‘g‘risida”gi qonunda «Aholi punktlarini rivojlantirish va ularda imorat qurishni rejalashtirish, binolar va inshootlarni loyihalashtirish, qurish, kengaytirish, rekonstruksiya qilish hamda texnik jihatdan qayta jihozlash chog‘ida yong‘in xavfsizligini ta‘minlash tegishincha shaharsozlik faoliyati sohasidagi maxsus vakolatli davlat organi, buyurtmachilar, imorat quruvchilar, loyiha va qurilish tashkilotlari zimmasiga yuklatiladi» deya keltirilgan.

Shunday ekan, insonlar sog‘ligi va qurilayotgan har bir hayoti, mol-mulkini bino va inshootlarda asrab qolish uchun

yong‘inlarni talafotlarsiz tez va samarali bartaraf etishda ichki yong‘inga qarshi jihozlarni amaldagi normativ hujjatlar talablari asosida o‘rnatib borishsa maqsadga muvofiq bo‘lar edi.

A. TAJIMURATOV,
Mo‘ynoq tumani
FV bo‘limi bo‘linma
boshlig‘i, katta
leytenant.



To‘shkent viloyatining Bo‘stonliq tumanidagi “Charos” bolalar sog‘lomlashtirish oromgohida «Respublikaning cho‘milish havzalarida xavfsizlikni ta‘minlash hamda kichik hajmli kemalar va ular turadigan bazalar (inshootlar)dan xavfsiz foydalanishni ta‘minlash» mavzusida respublika o‘quv-amaliy seminari o‘tkazildi.

OROMGOHDA SEMINAR

FVV, IIV, Fuqaro muhofazasi instituti xodimlari va professor-o‘qituvchilari, Toshkent viloyati FVB xodimlari, “Chorvoq” suv ombori hududida joylashgan dam olish maskani ma‘muriyati xodimlari, kichik hajmli kema haydovchilari, ommaviy axborot vositalari vakillari qatnashgan tadbir-



da texnika xavfsizligi qoidalariga rioya qilish, kichik hajmli kemalarning tuzilishi, qismlari, to‘xtab turish qurilmalaridan foydalanish qoidalari borasida so‘z yuritildi.

Ishtirokchilarga mavzuga oid videofilmlar, zamonaviy kichik hajmli kemalar ko‘rgazmasi, suvda cho‘kayotganlarni qutqarish hamda maxsus qutqaruv texnikalari yordamida qutqaruv ishlari namoyish etildi.

Sh.XALIKOV
FVV Akademiyasi
huzuridagi FMI
kafedra boshlig‘i,
polkovnik.

Xorazm viloyati FVB tomonidan kompleks tadbirlar amalga oshirilmoqda.

MUNTAZAM RAVISHDA

Jumladan, viloyat hududidagi umumta‘lim maktablarida o‘qituvchi va o‘quvchilarni jalb qilgan holda g‘avvoslik asbob-anjomlari, suvda cho‘kayotgan fuqaroni qutqarish usullari hamda qutqarilgan fuqaroga

birinchi yordam ko‘rsatish amaliy tushuntirildi.

S.ISKANDAROV,
Xorazm viloyati
FVB bo‘lim
boshlig‘i, kapitan.

J.NAZAROV,
bo‘lim javobgar
ijrochisi, oddiy
askar.

KO‘NIKMALAR OSHIRILDI

Samarqand shahridagi “FAMILY PARK” muz saroyida amaliy o‘quv mashqi o‘tkazildi. Unda favqulodda vaziyatlar yuzaga kelganda, ishchi-xodimlarning harakatlari ko‘rib chiqildi.



Shuningdek, viloyat FVB Hayot faoliyati xavfsizligi o‘quv markazi o‘qituvchilari tomonidan favqulodda vaziyatda jabrlanganlarga birinchi yordam ko‘rsatish hamda bunday vaziyatlarda nimalarga e‘tibor qaratish kerakligi tushuntirildi.

Sanjar ADILOV,
Samarqand viloyati FVB HFXO‘M
o‘qituvchisi.

XAVFSIZLIK MUHIM

Buxoro viloyati FVB tomonidan bolalar dam olish oromgoxlarining fuqaro muhofazasi va ёнғин хавфсизлиги ҳолати ўрганилди. Ўрганишлар давомида аниқланган камчиликлар тегишли тартибда бартараф этилди.

Шунингдек, “Нефтчи”, “Ёш алоқачи” оромгоҳларининг автоматик ёнғиндан хабар бериш ускуналари соз ҳолатга келтирилди. “Хумо” оромгоҳининг том ости ёғоч қурилмаларига ёниш хусусиятини пасайтирувчи суюқликлар билан ишлов берилиб, кундузги оромгоҳларнинг ёнғин ўчириш мосламалари қайта зарядланди ва шай ҳолга келтирилди.

Ҳозирда бу каби тадбирлар давом эттирилмоқда.

Ф.ПЎЛАТОВ,
Бухоро вилояти ФВБ бошлиғи
ўринбосари, подполковник.

Метрополитенда ёнғин хавфсизлиги

Тошкент Метрополитенида ЁХТБ бўлими вакиллари ҳамда Метрополитеннинг ҳарбийлаштирилган ёнғиндан сақлаш бўлими ходимлари ҳамкорлигида бекатларда ёнғин хавфсизлигини таъминлаш юзасидан ўрганишлар ўтказилмоқда.

Мазкур тадбирлар давомида ёнғин хавфсизлигига оид суҳбатлар ўтказилмоқда, йўриқномалар берилмоқда, эслатмалар тарқатилмоқда. Текширувлар давомида аниқланган камчиликлар бўйича объект раҳбарларига Давлат ёнғин назоратининг ёзма кўрсатмалари тақдим этилмоқда. Метрополитеннинг барча бекатларида ўрнатилган монитор ва ТВ кабеллар орқали ёнғин хавфсизлигини таъминлашга оид видеороликлар орқали тарғибот ва ташвиқот ишлари амалга оширилмоқда.

Жасур АБДУРАИМОВ,
Метрополитен ЁХТБ инспектори.

UCH GAZ KONIDA MASHG‘ULOT

Qashqadaryo viloyatidagi “POMUQ”, “ALAN” va “QULTAK” gaz konlarida maxsus-taktik o‘quv mashg‘uloti o‘tkazildi.

O‘quv nuqtalarida, sodir bo‘lgan shartli zilzila (avariya) haqida obyekt rahbari va fuqaro muhofazasi tuzilmalariga xabar berish, obyekt ishchi va xizmatchilarini evakuatsiya qilish, sodir bo‘lgan yong‘inni bartaraf etish ishlari viloyat FVB Avariya-qutqaruv guruhi

va obyekt fuqaro muhofazasi tuzilmalari tomonidan amaliy bajarildi.

Tadbirda FVDT tarkibiga kiruvchi korxonalar va tashkilotlar favqulodda vaziyatlarga qay darajada tayyor ekanliklari,

korxonalar ishchilarining bunday vaziyatlarda harakatlari sinovdan o‘tkazildi.

Husan BOBONOV,
Qashqadaryo viloyati FVB boshlig‘ining 1-o‘rinbosi — Shtab boshlig‘i, polkovnik.

MAVSUMGA SHAYLIK

Buxoro viloyatida bolalar oromgoxlarida zarur shartsharoitlar yaratish maqsadida bir qator ishlar amalga oshirilmoqda.

Hususan, ёнғинлар содир бўлишининг олдини олиш мақсадида вилоят ишчи гуруҳ ходимлари ва ҳамкорликдаги хизматлар билан биргаликда оромгоҳларнинг ёнғинга қарши воситалар билан тўлиқ таъминланиши ва ёнғинга қарши тарғиб этувчи бурчаклар тайёрланиб, ёнғин хавфсизлигини таъминлаш борасида зарур вазибалар бажарилмоқда.

А.САЛИМОВ,
Бухоро вилояти ФВБ инспектори, катта лейтенант.

МЕҲНАТКАШ ВА ТАШАББУСКОР

Маълумки, Фавқулдда вазиятлар вазирлиги тизимида ҳар бир вазифа ҳамда кўрсатмаларни тўлиқ ва ўз вақтида бажаришга ҳаракат қиладиган, интиладиган, ўз лавозими доирасида функционал вазифаларини бажаришга жиддий ёндашадиган ҳарбий хизматчилар ва хизматчилар кўпчилигини ташкил этади. Улар орасида фаолияти давомида бир қатор ижобий хислатлари, меҳнаткашлиги, ташаббускорлиги билан жамоа орасида ҳурматга, обрў-эътиборга эга бўлиб келаётган Самарқанд вилояти Фавқулдда вазиятлар бошқармаси Ҳаёт фаолияти хавфсизлиги ўқув маркази катта ўқитувчиси хизматчи Бахтиёр Мирзақобилов ҳам бор.



Б.Мирзақобилов 1971 йилда Жиззах вилоятининг Бахмал туманида, Юлдош Мирзақобилов ва Муҳаббат Мирзақобилова хонадонидан дунёга келган. Самарқанд давлат университетидан рус тили ва адабиёти фани ўқитувчиси мутахассислиги бўйича таҳсил олиб, ушбу олийгоҳни 1994 йилда татомлаган. 1995 – 1996 йилларда Самарқанд вилояти Мудофаа ишлари бошқармаси Фуқаро мудофааси ва фавқулдда вазиятлар бўлими раҳбарлар таркибини тайёрлаш маркази ўқитувчиси бўлиб ишлаган. 1996 – 1997 йилларда эса Самарқанд вилояти ФВБ раҳбарлар таркибини тайёрлаш маркази ўқитувчиси сифатида хизмат фаолиятини бошлаган. 1997 йилдан 2004 йилга қадар Самарқанд вилояти Фавқулдда вазиятлар бошқармаси раҳбарлар таркибини тайёрлаш маркази ўқув-услугият бўлими бошлиғи, 2004 – 2005 йиллар давомида бошқарма кадрлар ва тарбиявий ишлар бўлими бошлиғи, 2005 – 2011 йилларда ФВБ аҳолини ва раҳбарлар таркибини

тайёрлаш маркази катта ўқитувчиси, 2011 йилдан буён Ҳаёт фаолияти хавфсизлиги ўқув маркази катта ўқитувчиси лавозимида ишлаб келмоқда.

Хизматчи Б.Мирзақобилов ўз иш фаолияти давомида аҳоли ва ҳудудларни табиий ҳамда техноген хусусиятли фавқулдда вазиятлардан муҳофаза қилиш, вилоят аҳолисининг фуқаро муҳофазаси соҳасидаги билим ва кўникмаларини ошириш борасида кенг қўламли ишларни амалга ошириб келмоқда. У марказнинг тингловчилари, шу билан бир қаторда, ишлаб чиқариш ва хизмат кўрсатиш соҳасида банд бўлмаган аҳолини фавқулдда вазиятлардан муҳофаза қилиш соҳасида ва фуқаро муҳофазасига тайёрлаш бўйича 15 соатлик дастурларни ишлаб чиққан. Марказда ташкил этиладиган дарсларнинг сифатли ўтказилишини доимий равишда назорат қилиб боради ҳамда ойда бир маротаба марказ ўқитувчилари томонидан ўтказилган очиқ дарсларни жамоа ўртасида муҳокама қилиб,

камчиликларини биргаликда бар-тароф этади.

Бахтиёр Мирзақобилов фаолият юритаётган мазкур ўқув марказида 1996 – 2023 йиллар давомида Ўзбекистон Республикаси Фавқулдда вазиятлар вазирлиги Академияси ҳузуридаги Фуқаро муҳофазаси институтида жами 901 нафардан зиёд, Самарқанд вилояти ФВБ Ҳаёт фаолияти хавфсизлиги ўқув марказида жами 62889 нафардан зиёд раҳбар ходим ўқув машғулотларида қатнашиб, ўз малакаларини оширишган. У ўқитувчилик қилиб келаётган даврда ўқув марказида жуда катта ишлар амалга ошириб келинмоқда. Жумладан, ўқув марказида жами 3 та катта ўқув синф хонаси мавжуд бўлиб, улар замон талабларига мос қилиб жиҳозланган. Синф хоналаридаги стендлар, аҳолини ва раҳбарлар таркибини тайёрлашга оид бошқарув ҳужжатлари ҳамда ўқув қўлланмаларининг барчаси қайта таҳрир қилиниб, давлат стандартларига мос равишда ишлаб чиқилган ва ҳозирги кунда иш жараёнлари давом этмоқда.

Б.Мирзақобилов марказда ўқув-тайёрлов жараёнини ташкиллаштиришда барча меъёрий ҳужжатларни пухта, замон талабларига, яъни инновацион технологияларга асосида мукамал ишлаб чиқиш, кундалик дарс мобайнида кенг қўламда, мустақил фойдаланади. Уларни ҳар куни янги адабиётлар ва ўқув қўлланмалари билан бойитиб боради.

Шу билан бир қаторда, ҳамкасбларидан беғараз ёрдамини аямайди. Бошқармада ўтказиладиган барча тадбирларда фаол иштирок этади. Ушбу сифатлари билан бир неча маротаба вазирлик, бошқарма, вилоят ҳокимлиги ва бошқа ташкилотлар раҳбарияти томонидан фахрий ёрлиқлар ва миннатдорчиликларга сазовор бўлган. Қолаверса, 2009 йил Ўзбекистон Республикаси Фавқулдда вазиятлар вазирининг “Энг яхши



Аҳолини ва раҳбарлар таркибини тайёрлаш маркази” кўрик-танловида биринчи ўринни, 2013 йил якунлари бўйича ўтказилган танловда эса учинчи ўринни қўлга киритган.

Бахтиёр Мирзақобилов ташаббуси билан марказда ташкил этилган кутубхонада ҳар хил турдаги адабиётлар, жумладан, Президентимизнинг асарлари, Россия Федерацияси Фавқулдда вазиятлар вазирлигидан келтирилган соҳа йўналишига оид услубий дарсликлар, 419 та қонун ва қарорларнинг электрон вариантлари ва бошқа шунга ўхшаш бадиий адабиётлар мавжуд. Кутубхонадаги барча адабиётлардан ўқув жараёнида мустақил равишда фойдаланади. Аҳамиятлиси, Б.Мирзақобилов томонидан фуқаро муҳофазаси соҳасида Ҳаёт фаолияти хавфсизлиги ўқув марказининг тингловчилари учун услубий қўлланмалар ҳамда 40 дан зиёд ҳар хил мавзудаги эслатма ва буклетлар тайёрланиб, вилоятдаги барча корхона, ташкилот ва муассасаларга тарқатиб келинмоқда.

Унинг бошчилигида вилоят телевидениесига доимий равишда фуқаро муҳофазасига оид телекўрсатувлар ва радиоэшиттиришлар ташкил этиб турилади. У вилоятнинг аксарият маҳаллаларида бўлиб, маслаҳатхоналари ташкил этган, маҳаллалардаги ишлаб чиқариш ва хизмат кўрсатиш соҳасида банд бўлмаган аҳоли билан доимий равишда дастур асосида ўқув машғулотлари, семинарларни мунтазам равишда ўтказиб туради ва уларга амалий ёрдам кўрсатади.

4 нафар фарзанднинг меҳрибон отаси ҳамда 5 нафар набиранинг суюкли бобоси бўлган Бахтиёр Мирзақобилов бугунги кунда ишда ҳам, оилавий ҳаётда ҳам барчага ўрнак бўлиб келаётган инсонлардан. Албатта, устоз мақомидаги фидойи мутахассислардан ҳар лаҳзада тажриба, билим ва ҳаётий сабоқлар олиш ёш кадрлар салоҳиятининг юксалишида бош омилардан бўлиб хизмат қилади. Истагимиз шуки, орамизда Бахтиёр Мирзақобиловдек фидойи инсонлар кўпаяверсин.

Анвар ҚОБИЛОВ,
“Vaziyat” мухбири.



ПРОФИЛАКТИКА

Ҳозирда ёнғин-қутқарув хизмати ходимлари томонидан жойларда ёнғин ва бошқа тусдаги фавқулдда вазиятларнинг олдини олиш, содир бўлганда тўғри ҳаракатланиш, ёнғин-қутқарув техникалари ва асбоб-анжомлардан фойдаланиш бўйича учрашувлар ўтказилмоқда.

Мазкур тадбирлар жараёнида офатлар хавфи ҳамда уларнинг талафотли оқибатлари ҳақида тушунтиришлар берилиб, амалий машғулотлар ташкиллаштирилмоқда.

Тадбирлар якунида фавқулдда вазиятларга оид эслатма материаллари тарқатилиб, аҳолининг фавқулдда вазиятларда тўғри ҳаракат қилишга оид билимлари янада мустаҳкамланмоқда.

Масудали САЙИДИЙ,
Тошкент шаҳар ФВБ ЁХТТЭБ
инспектори, капитан.

БЕЛГИЛАНМАГАН ЖОЙЛАРДА ЧЎМИЛМАНГ!



Статистик маълумотларга кўра, республикамиз бўйича сувдаги ҳалокатларнинг деярли 95 фоизи белгиланмаган ва чўмилиш рухсат этилмаган жойларда қайд этилган. Бу каби жойларга Тошкент вилоятининг Ўртачирчиқ тумани ҳудудидан оқиб ўтувчи Қорасув дарёси, Тошкент канали ва “Туябўғиз” сув омбори киради.

Фуқароларимизнинг эътиборсизлиги, беларволиги сабаб вилоятимизда сувда чўкиб вафот этиш билан боғлиқ бахтсиз ҳодисалар сони ортиб бормоқда.

Яна бир бор белгиланмаган жойларда чўмилиш ҳаётингиз учун хавфлилиги, сузишни билиш эса хавфсизликка кафолат бўла олмаслигини эслатиб ўтамиз...

Хавфсизлик қоидаларига риоя қилиш саломатлигингиз ва ҳаётингиз кафолати эканлигини унутманг!

Ж.ҚАМБАРОВ,
Ўртачирчиқ тумани ФВБ бўлими НТБ
бошлиғи, капитан.
А.ЗОКИРОВ,
инспектор, катта сержант.

Abu Ali Ibn Sino nomidagi Jamoat salomatligi texnikumida o'qituvchi va o'quvchilar ishtirokida "Zilzila sodir bo'lganda aholining to'g'ri harakati" va "Cho'milish qoidasi – umr foydasi" kabi mavzularda profilaktik targ'ibot tadbiri bo'lib o'tdi.

TARG'IBOT



Unda texnikumning o'quv va tarbiyaviy ishlar bo'yicha direktor o'rinbosari A.Jamolov so'zga chiqib, bugungi kunda respublikamizda aholi xavfsizligini ta'minlash, ularni turli favqulodda vaziyatlardan muhofaza qilish bo'yicha amalga oshirilayotgan tadbirlar haqida to'xtaldi.

Tadbirda Samarqand viloyati FVB Hayot faoliyati xavfsizligi o'quv markazi o'qituvchisi A.Turdiqulov ham so'z olib, zilzila sodir bo'lganda aholining to'g'ri harakati, cho'milish qoidalarini xususida tushuntirish va tavsiyalar berildi.

Sanjar ADILOV,
Samarqand viloyati FVB
HF XO'M o'qituvchisi.

ЙЎРИҚНОМА ЎТКАЗИЛДИ

Ўзбекистон Республикаси Президенти ҳузуридаги давлат бошқаруви академияси қурилиши ишчи-ходимлари иштирокида учрашув ўтказилди.



Тадбир давомида ходимларга ёнғин ва бошқа тусдаги фавқулдда вазиятларнинг олдини олиш, ёнғин ва техника хавфсизлиги қоидаларига амал қилиш лозимлиги тушунтирилиб, йўриқнома берилди.

Жаҳонгир ЭГАМОВ,
ДБА биносида ЁХТТЭБ мутахассиси,
катта сержант.

АТТРАКСИОНЛАР ХАВФСИЗЛИГИ

Хоразм вилояти ҳудудидagi madaniyat va istirohat bog'larida joylashgan atraktsionlar holati viloyat ishchi guruhi tomonidan o'rganib chiqildi.

O'rganishlar xulosasiga ko'ra, 108 ta atraktsiondan 88 tasining faoliyati belgilangan tartibda to'xtatilib, elektr manbaidan ajratildi. Ishlash muddati o'tgan, yaroqsiz va qo'lbola deb topilgan atraktsionlarning 20 tasi belgilangan tartibda demontaj qilinib, foydalanishdan chiqarildi.

Hozirda bu boradagi ishlar davom ettirilmoqda.

S.ISKANDAROV,
Xorazm viloyati FVB bo'lim boshlig'i,
kapitan.
J.NAZAROV,
bo'lim javobgar ijrochisi, oddiy askar.



Ғалла-2023 мавсуми бошланишидан олдин фермерлар ва фуқароларга ғалла майдонлари атроф-ҳудудларини хашак ва қуриган ўтлардан тозалаш, ғалла майдонларида тамаки маҳсулотларини истеъмол қилмаслик, ғалла майдонларидан 50 метрдан кам бўлмаган ҳолатларда очиқ оловдан фойдаланмаслик лозимлиги тушунтирилди.

ҒАЛЛАНИ ЁНҒИНДАН АСРАНГ!

Шунингдек, ғалла мавсумида жиҳозлаш зарурлиги эслатилишига жалб қилинган қишлоқ хўжалиги техникаларини бирламчи ёнғин ўчириш воситалари ҳамда соз ҳолатдаги учқун сўндиргичлар билан

Ф.ПАНОҲИДДИНОВ,
Чуст туман ФВ бўлими
инспектори.

Бугунги кунда соҳа мутахассислари томонидан ёнғин ва бошқа тусдаги фавқулдда вазиятларнинг олдини олиш юзасидан умумтаълим мактаблари ва маҳаллаларда учрашувлар ташкил қилиб борилмоқда.

ДАВОМЛИ ТАДБИРЛАР

Мазкур тадбирлар давомида ёнғин-қутқарув техникалари ва асбоб-анжомлардан фойдаланиш бўйича учрашув, давра суҳбатлари ва кўргазмалар ташкил қилинмоқда. Иштирокчиларга фавқулдда вазиятлар, уларнинг хавфи ва талафотли оқибатлари ҳақи-

да тушунтиришлар берилиб, амалий машғулотлар ўтказилмоқда.

Шухрат САМИГОВ,
Тошкент шаҳар
ФВБ ЁХТТЭБ
мутахассиси,
оддий аскар.

METEOROLOGIK RADIOLOKATOR

Namangan viloyati To'raqo'rgon tumanida yangi qurilgan Meteorologik radiolokator foydalanishga topshirildi.



Mazkur qurilma 200 km. radiusda mavjud va kutilayotgan ob-havo hodisalarini to'g'risida, jumladan, bulutlar oqimi va turi, shamol tezligi hamda yo'nalishi, yog'ingarchiliklar miqdori hamda uning davomiyligi, momaqaldiroq sodir bo'lgan hududlarni vizualizatsiya qilish orqali meteorologik kartalarga tushirilgan holda oldindan xabardor qilish imkoniyatlari mavjud bo'ladi. Kuzatuv ma'lumotlari esa har 10 daqiqada yangilanib, muntazam ravishda o'zgidroment axborot geoportaliq uzatib boriladi.

Namangan viloyati FVB
axborot xizmati.

Олмазор туманидаги “Чуқурсой” МФЙда ёнғин ва бошқа тусдаги фавқулдда вазиятларнинг олдини олиш, содир бўлганда тўғри ҳаракатланиш, ёнғин-қутқарув техникалари ва асбоб-анжомлардан фойдаланиш бўйича учрашув ўтказилди.

МАҲАЛЛАДА СУҲБАТ

Учрашув давомида ёнғин ва бошқа тусдаги фавқулдда вазиятлар, уларнинг хавфи ва талафотли оқибатлари ҳақида тушунтиришлар берилиб, амалий машғулотлар ташкиллаштирилди.

Баҳодир ИБРАГИМОВ,
Тошкент шаҳар ФВБ ЁХТТЭБ
мутахассиси, оддий аскар.

НАЗОРАТ

“Қамчиқ” махсус қидирув, ёнғин-қутқарув бошқармасида ўрганиш ишлари давомида довонда жойлашган “Чинор” йўл-патруль хизмати маскани орқали хавфли юкларнинг ташилиши, сайёҳларни ташишга мўлжалланган 15 кишилик микроавтобусларнинг хавфсиз ҳаракатланиши бўйича бажарилаётган чора-тадбирлар билан танишилди.

“Бешқўл” масканида навбатчилик олиб бораётган қутқарувчиларнинг жисмоний, касбий ва жанговар тайёргарлиги, қутқарувчи мақоми бўйича амалга оширилган тадбирлар, меъёрий ҳужжатлар ҳолати ўрганилди.

Бундан ташқари, довонда содир бўлган йирик фавқулодда вазиятлар ва автомобиль йўлининг вақтинчалик ёпилиши билан боғлиқ вазиятларда Республика



идоралараро штаби ишчи гуруҳи аъзоларининг ҳаракатлари кўриб чиқилди.

Ҳ.БОБОНОВ,
“Қамчиқ” МҚЁҚБ бошлиғи,
полковник.

ХОТИН-ҚИЗЛАР ВА БОЛАЛАР ҲУҚУҚЛАРИ ҲИМОЯСИ

Ўзбекистон Республикасининг 2023 йил 11 апрелдаги “Хотин-қизлар ва болалар ҳуқуқлари, эркинликлари ҳамда қонуний манфаатларини ишончли ҳимоя қилиш тизимини янада такомиллаштирилиши муносабати билан Ўзбекистон Республикасининг айрим қонун ҳужжатларига ўзгартиш ва қўшимчалар киритиш тўғрисидаги” ЎРҚ-829-сон қонуни билан Ўзбекистон Республикаси айрим қонунларига ўзгартиш ва қўшимчалар киритилди.

Жумладан, мазкур қонунга мувофиқ, Ўзбекистон Республикасининг Жиноят кодексига бир қанча ўзгартиш ва қўшимчалар киритилди, шунингдек, “Оилавий (маиший) зўравонлик” деб аталган 126¹-модда, шунингдек, «Шахснинг шаънини ва қадр-қимматини камситувчи ҳамда инсон ҳаётининг сир тутиладиган томонларини акс эттирувчи маълумотларни ошкор қилиш» деб аталган 141³-модда билан тўлдирилди.

Ўзбекистон Республикасининг Маъмурий жавобгарлик тўғрисидаги кодексига ҳам бир қанча ўзгартиш ва қўшимчалар киритилди, янги моддалар билан тўлдирилди.

Жумладан, «Ҳақ тўланадиган жамоат ишларига мажбурий равишда жалб этиш» деб аталган 28¹-модда билан, шунингдек, “Шахвоний шилқимлик қилиш” деб аталган 41¹-модда билан, «Ота-онанинг ўз вояга етмаган болаларига васий ёки ҳомий тайинлаш бўйича мажбуриятларини бажармаслиги» деб аталган 47¹-модда билан ва «Оилавий (маиший) зўравонлик» деб аталган 59²-моддалар билан тўлдирилди.

Шу каби Ўзбекистон Республикасининг 2019 йил 2 сентябрда қабул қилинган «Хотин-қизларни тазйиқ ва зўравонликдан ҳимоя қилиш тўғрисида»ги ЎРҚ-561-сон қонунига ҳам ўзгартиш ва қўшимчалар киритилди, шунингдек, “Ҳимоя ордерининг амал қилиш муддатини узайтириш” деб номланган 23¹-модда билан тўлдирилди.

Ҳимоя ордерининг амал қилиш муддатини узайтириш тўғрисидаги илтимоснома материаллар келиб тушган пайтдан эътиборан йигирма тўрт соат ичида ёпиқ суд мажлисида жабрланувчи ҳамда тазйиқ ўтказган ва (ёки) зўравонлик содир этган ёхуд уларни содир этишга мойил бўлган шахс ҳозирлигида кўриб чиқилади.

Судья иш материаллари билан танишиб чиққанидан кейин ҳимоя ордерининг амал қилиш муддатини узайтириш тўғрисида ёки ҳимоя ордерининг амал қилиш муддатини узайтириш тўғрисидаги илтимосномани қаноатлантиришни рад этиш ҳақида қарор чиқаради.

Суднинг ҳимоя ордерининг амал қилиш муддатини узайтириш тўғрисидаги қарори ўқиб эшиттирилган пайтдан эътиборан кучга киради ва ички ишлар органлари томонидан дарҳол ижро этилади.

Мазкур қонун хотин-қизлар ва болаларга нисбатан шилқимлик ҳамда зўравонликнинг олдини олиш, оилаларда маънавий-ахлоқий муҳитни соғломлаштириш, болалар ва хотин-қизлар ҳуқуқлари билан боғлиқ халқаро индексларда мамлакатимизнинг ўрнини яхшилаш, шунингдек, Болалар масалалари бўйича Қорақалпоғистон Республикаси, вилоятлар, Тошкент шаҳар ва туманлар (шаҳарлар) комиссиялари фаолиятининг мустаҳкам ҳуқуқий асосини яратишга хизмат қилади.

М.ҲАСАНОВА,
жиноят ишлари бўйича Сергели туман судининг судьяси.

BAXTSIZ HODISALARNING OLDINI OLISH

Fuqarolarning suv havzalarida xavfsizligini ta'minlash hamda ular bilan bog'liq favqulodda vaziyatlar va baxtsiz hodisalarning oldini olish maqsadida viloyat FVB harbiy xizmatchilari tomonidan kompleks profilaktik tadbirlar amalga oshirilmoqda.

Jumladan, hududagi umumta'lim maktabilarida o'qituvchi va o'quvchilarni jalb qilgan holda g'avvoslik asbob-anjomlari, suvda cho'kayotgan fuqaroni qutqarish hamda qutqarilgan fuqaroga birinchi yordam ko'rsatish usullari amaliy tushuntirildi.

S.ISKANDAROV,
Xorazm viloyati FVB bo'lim boshlig'i,
kapitan.

J.NAZAROV,
bo'lim javobgar ijrochisi, oddiy askar.

МУҲИМ МАВЗУДА

Олмазор туманидаги “Ёшлик” МФЙда ёнғин ва бошқа тусдаги фавқулодда вазиятларнинг олдини олиш, содир бўлганда тўғри ҳаракатланиш, ёнғин-қутқарув техникалари ва асбоб-анжомлардан фойдаланиш бўйича учрашув, давра суҳбатлари ва кўргазмалар ташкил қилинмоқда.

Мазкур тадбирлар давомида иштирокчиларга фавқулодда вазиятлар, уларнинг хавфи ва талафотли оқибатлари ҳақида тунтиришлар берилиб, амалий машғулотлар ташкиллаштирилмоқда.

Отабек АКРОМОВ,
Тошкент шаҳар ФВБ инспектори, капитан.

МАВСУМ ОЛДИДАН

Тошкент шаҳар ФВБ томонидан бахтсиз ҳодисаларнинг олдини олиш юзасидан аҳоли ва фуқаролар ўртасида мунтазам равишда тушунтиришлар ўтказилиб, чўмилиш тақиқланган очиқ сув ҳавзалари, сув омбори, дарё, канал ва сойларда назорат текширувлари, рейдлар, тарғибот-ташвиқот ишлари, профилактик тадбирлар ўтказилмоқда

Тарғибот тадбирлари давомида фуқароларга сувда сузишни билмаслик ва чўмилиш қоидаларини бузиш инсон ҳаёти учун ўта хавфли

эканлиги, шунинг учун болаларни сувда сузишга ўргатиш лозимлиги тушунтириб борилмоқда.

Очиқ сув ҳавзаларида сузишни ўрганишда,

FOYDALI SABOQLAR

Ohangaron shahar FV bo'limi, IIB, MG hamda mahalla fuqarolar yig'inlari mas'ullari hamkorligida shahar hududidan oqib o'tuvchi kanal, soy va daryolarning cho'milish taqiqlangan joylarida fuqarolar cho'milishining oldini olish hamda xavfsizligini ta'minlash maqsadida profilaktik tadbirlar olib borilmoqda.



Navbatdagi tadbir “Qo'rg'on” hamda “Yangibod” mahalla fuqarolar yig'inlarida o'tkazildi. Unda voyaga yetmagan yosh bolalarning belgilanmagan joylarda cho'milish holatlari aniqlanib, bolalarga nazoratsiz joylarda cho'milish hayoti va sog'lig'iga xavfli ekanligi bo'yicha tushuntirish ishlari amalga oshirildi.

Shahar hududida profilaktik tadbirlar kun-u tun amalga oshirilib, tegishli xizmatlar bilan nazorat postlari tashkil etildi.

Azizbek QO'SHAQOV,
Ohangaron shahar FV bo'limi boshlig'i o'rinbosari,
kapitan.

Jamol TOSHBOYEV,
bo'linma boshlig'i,
leytenant.

БЕТАЛАФОТ ЎТКАЗАЙЛИК

Ўрим-йиғим даврида ғаллани ёнғиндан асраш бўйича кўплаб ишлар амалга оширилсада, айрим ҳолларда ғалла майдонларида ҳосилни йиғиштириб олиш даврида ёнғин содир бўлишини кузатиш мумкин.

Бунга сабаб сифатида об-ҳавонинг кескин исиб кетиши, мавсум даврида ўрим машинасига техник кўрик кўрсатишнинг кечикиши, айрим ҳолларда ғалла майдонларидан ўтган юқори кучланишдаги электр линиялари, ғалла майдонларида сигарет чекишга йўл қўйилиши ва шунга ўхшаш бир қатор омилларни келтириш мумкин.

Ғалла майдонларида ёнғин содир бўлганда,

ёнғин майдонининг катта ёки кичиклигидан қатъи назар ўрим-йиғимга жалб қилинган комбайнларда ва ғаллани ташиш учун бириктирилган автомобилларда дастлабки ёнғин ўчириш воситалари билан таъминланганлиги ва уларнинг доимий соз ҳолда бўлиши талаб этилади.

С.МУРТАЗОЕВ,
Бухоро вилояти ФВБ инспектори, катта лейтенант.

ДОННИ АСРАЙЛИК!

«Ғалла-2023» мавсумида ғаллани ёнғин чиқиш хавфидан сақлаш барчамизнинг бурчимиздир. Чунки ғалла давлат ва умумхалқ назоратидаги ризқ-рўзимиз, унинг бирор мисқолининг исроф бўлишига, айниқса, ёниб кетишига, асло йўл қўйиб бўлмайд.

Шундай экан, ғалла ўрим-йиғими мавсумида ғалла майдонларида ёнғин хавфсизлиги қоидаларига тўлиқ амал қилишимиз лозимлигини унутмаслигимиз зарур.

С. ЗУЛУНОВ,
Анджон вилояти ФВБ ОАВ ва ЖТБҲҚ бошлиғи, майор.

ЭЗГУ САНА

1 июнь – Халқаро болаларни ҳимоя қилиш куни

1 июнь – Халқаро болаларни ҳимоя қилиш куни 1925 йил Швейцариянинг Женева шаҳрида болалар фаровонлигига бағишланган Бутунжаҳон конференциясида таъсис этилган бўлса, орадан 25 йил ўтиб 1950 йилдан бутун дунёда байрам сифатида нишонланиб келинади.

Болалар ҳаётимиз давомчилари, келажакимиз эгаларидир. Бинобарин, уларни асраб-авайлаш, ҳар томонлама баркамол этиб вояга етказиш ҳар бир оила, ҳар бир ота-онанинг муқаддас бурчидир.

Жонажон Ўзбекистонимизда фарзандларимиз ана шундай меҳр-муҳаббат, улкан ғамхўрликлар оғушида вояга етмоқда.

Бизнинг халқимиз жуда ҳам болажон, айниқса, пандемия туфайли карантин жорий этилганлигининг битта яхши томони ҳам бўлди, оилада ҳамма жамулжам бўлиб, айниқса, бундан болалар хурсанд бўлишди.

Ота- оналар билан биргаликда дарс тайёрлаш, китоб ўқиш, боғда ишлаш, телевизор кўриш, компьютер ўйнаш жуда мароқли бўлди.



С.МИРЗАЛИЕВ,
“Қамчиқ” МҚЁҚБ АХБваКБ бошлиғи,
II даражали сержант.



ХАЛҚАРО КУН ТАРИХИ

Ёзнинг биринчи кунига тўғри келадиган мазкур сана энг қадимий халқаро байрамлардан бири бўлиб, бутун дунёда 1950 йилдан бери нишонланади.

Уни ўтказиш тўғрисида қарор 1949 йил ноябрь ойида бўлиб ўтган махсус сессияда Халқаро Демократик Аёллар Федерацияси томонидан қабул қилинди. БМТ ушбу ташаббусни қўллаб-қувватлади ва болалар ҳуқуқлари, ҳаёти ва саломатлигини ҳимоя қилишни ўз фаолиятининг устувор йўналишларидан бири деб эълон қилди.

Халқаро болаларни ҳимоя қилиш куни, энг аввало, катталарга болаларнинг яшаш, фикр ва эътиқод эркинлиги, таълим олиш, ҳордиқ чиқариш ва ҳордиқ чиқариш ҳуқуқларини ҳурмат қилиш, жисмоний ва руҳий зўравонликдан ҳимоя қилиш зарурлигини эслатиб туради. Инсонпарвар ва адолатли жамиятни шакллантириш учун зарур шарт-шароитлар сифатида болалар меҳнатидан фойдаланиш.

1959 йилда Бирлашган Миллатлар Ташкилоти томонидан Бола ҳуқуқлари дек-

ларацияси қабул қилинди. Унда ота-оналар, давлат органлари, маҳаллий ҳокимият ва ҳукуматлар, нодавлат ноижорат ташкилотлари болаларнинг уларда белгиланган ҳуқуқ ва эркинликларини тан олишга ва уларни ҳурмат қилишга интилишга чақирувчи моддалар мавжуд. Декларация фақат тавсия характери эга бўлиб, мажбурий кучга эга эмас эди.

Бола ҳуқуқлари халқаро ҳуқуқ даражасида кўриб чиқилган биринчи ва асосий халқаро ҳуқуқий ҳужжат 1989 йил 20 ноябрда БМТ томонидан қабул қилинган Бола ҳуқуқлари тўғрисидаги конвенциядир. Болалар ҳар бир мамлакат аҳолисининг тахминан 20–25 фоизни ташкил қилади. Турли мамлакатларда улар турли хил хавф-хатарларга дучор бўлиб, уларни ҳимоя қилиш керак: ривожланган мамлакатларда булар телевизор ва компьютерга қарамликнинг салбий оқибатларидан. Жиддий тадқиқотлар шуни кўрсатдики, болалар ҳаётда ўзларининг шафқатсиз ҳаракатларидан нусха кўчиришга мойилдирлар

(масалан, фильмлар ёки компьютер ўйинларидан).

Яна бир муаммо, Ғарбий Европада болаларнинг эрта жинсий ривожланишидан хавотирда, Японияда улар асосий хавфни анъанавий таълим усулларини йўқ қилишда ва Ғарб одатлари ва хатти-ҳаракатларининг, тобора ортиб бораётган кириб боришидан кўришмоқда. Африка ва Осиёда болаларга очлик, ОИТС, саводсизлик ва ҳарбий можаролар таҳдид солмоқда.

Россияда болалар ҳуқуқлари 1998 йил 24 июлдаги “Россия Федерациясида бола ҳуқуқларининг асосий кафолатлари тўғрисида” Федерал қонуни билан ҳимояланган. У Россия Федерацияси Конституциясида назарда тутилган боланинг ҳуқуқлари ва қонуний манфаатларининг асосий кафолатларини белгилайди.

Ўзбекистонда болалар ҳуқуқлари, авваламбор,

Конституция билан белгиланган. Шунингдек, 2007 йилда қабул қилинган “Бола ҳуқуқлари кафолатлари тўғрисидаги” қонун, 2019 йил 22 апрелдаги “Бола ҳуқуқлари кафолатларини янада кучайтиришга оид қўшимча чоратadbирлар тўғрисида”ги қарори билан ҳимояланган. Шунингдек, Ўзбекистонда 2019 йилдан бошлаб “болалар омбудсмани” институти жорий этилган.

Ундан ташқари, Ўзбекистонда болаларни ҳар томонлама, ҳам жисмоний ҳам интеллектуал етук инсонлар бўлиб ўсишини таъминлаш мамлакатимизда устувор вазибалар қаторига киритилган.

Халқаро болаларни ҳимоя қилиш куни ҳар доим турли тadbирлар билан нишонланади, унинг мақсади, бутун дунёдаги болаларнинг аҳолига эътиборни қаратишдир.

Интернет материаллари асосида тайёрланди.

ФВВ раҳбарияти ва шахсий таркиби вазирлик ҳузуридаги Сейсмопрогностик мониторинг Республика маркази Маъмурий хўжалик бўлими ходими Нуҳриддин ИСМОИЛОВга падари бузруквори
МЕҲРИДДИН ОТАНИНГ
вафоти муносабати билан чуқур таъзия изҳор этади.



Vaziyat

газетаси

Муассис:
Ўзбекистон
Республикаси
Фавқуллода
вазиятлар
вазирлиги

Бош муҳаррир в.б.
Азамат СУЙОНОВ

Газета таҳририят
компьютерхонасида
саҳифаланди.

Газета ҳар ҳафтанинг
пайшанба куни чиқади.
Топшириш вақти — 15:00.
Топширилди — 15:00.

Навбатчи:
М.САНАЕВ

Таҳририятга юборилган
материаллар қайтарилмайди ва
изоҳ берилмайди.
Муаллифлар фикри таҳририят
нуқтаи назаридан фарқланиши
мумкин.

Газетадан олинган
материаллар манбаси
кўрсатилиши шарт.

Газета Ўзбекистон
Матбуот ва ахборот
агентлигида 2007 йил
3 январда 0096-рақам
билан рўйхатга олинган.
ISSN 2091-5292

Таҳририят манзили:
100084, Тошкент шаҳри,
Кичик ҳалқа йўли, 4-уй.
Тел.: (71) 231-96-71
Телеграмм: (90) 016-87-67

Индекс:
якка обуначилар ва
ташкilotлар учун — 382

Газета
“BUSINESS PRINT DESIGN”
босмахонасида босилди.
Манзил: Тошкент шаҳри,
Сўғалли ота кўчаси, 5-уй.
Буюртма №
Бичими: А3, ҳажми: 2,0 б.т
Адади — 6630 нусха